



**BOSNIA AND HERCEGOVINA**  
MINISTRY OF FINANCE  
AND TREASURY

**CENTRALNA/SREDIŠNJA HARMONIZACIJSKA JEDINICA**  
**ЦЕНТРАЛНА ХАРМОНИЗАЦИЈСКА ЈЕДИНИЦА**

Broj: 02-1-16-7-30-1/22  
Sarajevo, 31.01.2022. godine

Na osnovu člana 61. stav (2) Zakona o upravi ("Službeni glasnik BiH", br. 32/02, 102/09 i 72/17) i člana 24. tačka b) Zakona o internoj reviziji institucija Bosne i Hercegovine ("Službeni glasnik BiH", br. 27/08 i 32/12) i Odluke o usvajanju Strategije razvoja sistema internih finansijskih kontrola u institucijama BiH ("Službeni glasnik BiH", broj 43/20), direktor Centralne harmonizacijske jedinice Ministarstva finansija i trezora Bosne i Hercegovine, donosi

**PLAN I PROGRAM OBUKA**  
**ZA INTERNE REVIZORE U INSTITUCIJAMA BOSNE I HERCEGOVINE**  
**ZA 2022. GODINU**

**Član 1.**  
**(Predmet)**

Predmet Plana i programa obuka za interne revizore u institucijama Bosne i Hercegovine za 2022. godinu je definiranje programa obuka za interne revizore u institucijama BiH, koje organizira Centralna harmonizacijska jedinica Ministarstva finansija i trezora Bosne i Hercegovine.

**Član 2.**  
**(Svrha)**

Svrha Plana i programa obuka za interne revizore u institucijama Bosne i Hercegovine za 2022. godinu je da se interni revizori u institucijama BiH, u cilju održavanja i unapređenja nivoa stručnosti i kvaliteta usluga koje pružaju:

- (1) usavršavaju i unapređuju svoja znanja, vještine i druge sposobnosti kroz proces kontinuirane profesionalne edukacije i
- (2) upoznaju sa stepenom uspostavljenosti i planiranim mjerama za daljnji razvoj sistema javne interne finansijske kontrole u institucijama BiH.

**Član 3.**  
**(Program obuka)**

Plan i program obuka za interne revizore u institucijama Bosne i Hercegovine za 2022. godinu treba pomoći internim revizorima u planiranju edukacija, unapređenju i razvoju njihovih vještina i znanja, u skladu s oblastima definiranim članom 29. Programa obuke i certificiranja internih revizora u institucijama Bosne i Hercegovine ("Službeni glasnik BiH" br. 7/15 i 89/18 - dalje u tekstu: "Program"), Odlukom o načinu bodovanja, evidentiranja i izvještavanja o kontinuiranoj profesionalnoj edukaciji internih revizora u institucijama Bosne i Hercegovine ("Službeni glasnik BiH", br. 56/17 i 65/19 - dalje u tekstu: "Odluka") i Strategijom razvoja sistema internih finansijskih kontrola u institucijama BiH za period 2020-2025. godina (dalje u tekstu: "Strategija").

#### **Član 4. (Obuke iz interne revizije)**

Iz oblasti interne revizije, Centralna harmonizacijska jedinica Ministarstva finansija i trezora BiH će tokom 2022. godine organizirati, u skladu s Programom i Odlukom, obuke na kojima će se obraditi sljedeće teme:

- (1) Korištenje PIFC aplikacije - modul interne revizije i
- (2) Godišnje izvještavanje jedinica interne revizije u institucijama BiH.

#### **Član 5. (Obuke iz FUK-a)**

Iz oblasti finansijskog upravljanja i kontrole, Centralna harmonizacijska jedinica Ministarstva finansija i trezora BiH će tokom 2022. godine, u skladu sa Strategijom, organizirati obuke na kojima će se obraditi tema:

- (3) Korištenje PIFC aplikacije u dijelu modula za finansijsko upravljanje i kontrolu (FUK).

#### **Član 6. (Vremenski okvir za održavanje obuka)**

Planirano je da se obuke iz čl. 4 i 5. održe kako slijedi:

- Korištenje PIFC aplikacije - modul interne revizije: *II - III kvartal 2022. godine;*
- Godišnje izvještavanje jedinica interne revizije u institucijama BiH: *III - IV kvartal 2022. godine;*
- Korištenje PIFC aplikacije u dijelu modula za FUK: *II - III kvartal 2022. godine.*

Navedene obuke održat će se u skladu s uslovima i mogućnostima vezanim za cjelokupnu situaciju u vezi sa stanjem prouzrokovanim pandemijom COVID-19, a polaznici obuka će biti blagovremeno obaviješteni o terminima i detaljima održavanja obuka.

#### **Član 7. (Bodovanje obuka kao KPE)**

Navedene obuke bodovat će se kao kontinuirana profesionalna edukacija internih revizora u institucijama BiH, u skladu s odredbama člana 5. stav (9) Odluke, a u pozivu za svaku obuku bit će navedeno koliko bodova kontinuirane profesionalne edukacije nosi svaka od konkretnih obuka iz čl. 4. i 5. pojedinačno.

#### **Član 8. (Bodovanje od strane Agencije za državnu službu BiH)**

Centralna harmonizacijska jedinica Ministarstva finansija i trezora BiH će, u skladu s članom 31. Odluke o načinu provođenja obuke državnih službenika u institucijama Bosne i Hercegovine („Službeni glasnik BiH“, broj: 15/17), Agenciji za državnu službu BiH dostaviti sve relevantne podatke u vezi s planiranim obukama radi utvrđivanja broja kredita.

Centralna harmonizacijska jedinica Ministarstva finansija i trezora Bosne i Hercegovine dostavit će polaznicima obuke informaciju Agencije za državnu službu BiH o utvrđenom broju dodijeljenih kredita za predmetnu obuku.

#### **Član 9. (Obaveze izvođača obuka - instruktora)**

Izvođači obuka - instruktori za navedene obuke dužni su:

- držati se sadržaja obuke i preporuka Centralne harmonizacijske jedinice Ministarstva finansija i trezora BiH,
- pripremiti i dostaviti adekvatnu prezentaciju u .pptx formatu (*Power Point*) i

- stručno, kvalitetno i profesionalno provesti obuku za koju su zaduženi.

**Član 10.**  
**(Naknade izvođačima obuka – instruktorima)**

- (1) Angažirani vanjski izvođači obuka - instruktori imaju pravo na naknadu za svoj rad na obukama u iznosu od 50,00 KM za jedan školski čas, u skladu s članom 16. stav (1) tačka a) Odluke o načinu provođenja obuke državnih službenika u institucijama BiH.
- (2) Centralna harmonizacijska jedinica Ministarstva finansija i trezora BiH će sa svakim angažiranim vanjskim instruktorom zaključiti ugovor o djelu/privremenim i povremenim poslovima.
- (3) Sredstva za ove naknade osigurana su u budžetu Centralne harmonizacijske jedinice Ministarstva finansija i trezora BiH za 2022. godinu.

**Član 11.**  
**(Odstupanje od Plana i programa obuka)**

- (1) Centralna harmonizacijska jedinica Ministarstva finansija i trezora BiH zadržava pravo na odstupanje od ovog plana u zavisnosti od opće epidemiološke situacije i mjera nadležnih institucija u vezi s pandemijom koronavirusa (COVID-19).
- (2) Centralna harmonizacijska jedinica Ministarstva finansija i trezora BiH zadržava pravo na odstupanje od tema i vremenskog okvira za održavanje obuka i u slučaju drugih nepredviđenih okolnosti koje mogu imati značajan uticaj na ovaj plan.

**Član 12.**  
**(Stupanje na snagu)**

- (1) Plan i program obuka za interne revizore u institucijama Bosne i Hercegovine za 2022. godinu stupa na snagu danom donošenja.
- (2) Plan i program obuka za interne revizore u institucijama Bosne i Hercegovine za 2022. godinu bit će objavljen i na veb stranici Centralne harmonizacijske jedinice Ministarstva finansija i trezora BiH <https://chj.mft.gov.ba>.

**DIREKTOR**

**Ranko Šakota, s.r.**